

鄭
堂
讀
書
記

鄭堂讀書記卷六十五

烏程周中孚撰

子部十二之三

小說家類三

雜事下 元至 國朝

東南紀聞三卷 墨海金壺本

不著撰人名氏 四庫全書著錄錢氏補元志 雜家類

類亦載之蓋宋末元初人所作也原本久佚卷數

無考今館臣從永樂大典錄出分爲三卷錢氏卽

遵館本卷數載之耳其書乃追記南宋時事故曰

東南間涉北宋及古事者不過連類及之凡八十

鄭記六十五

四條頗足以補史傳之遺而紀載失實者亦時有之甚至記及長沙推官陳某見南岳夫人事尤小說中無稽之談也張若雲從文瀾閣本錄出校梓冠以提要一篇

山房隨筆一卷

知不足齋叢書本

元蔣子正撰

子正字平仲里貫未詳嘗爲溧陽學官蓋宋人入元者也

四庫

全書著錄錢氏補元志

雜家類

亦載之是書所記凡

四十六條多宋末元初之事頗類詩話而敘賈似道誤國始末及木棉菴事尤詳足以補史書之闕然間有附會處究不脫小說氣習末有鮑淥飲跋說郭說海歷代詩話所收均節本耳

歸潛志十四卷

知不足齋叢書本

元劉祁撰

祁字京叔渾源人金太學生舉進士不就試魁南京選充山西東路考

試官後征南行省辟置幕府

四庫全書著錄

倪氏錢氏補元志

雜史類

俱載之前有歲乙未自序

稱念昔所與交游皆一代偉人其言論談笑想之猶在目且其所聞所見又以勸戒規鑒者不可使湮沒無傳因暇日記憶隨得隨書題曰歸潛志歸潛者予所居之堂名也案乙未歲當元太宗在位之七年卽金亡之次年故有志於歸潛後仍出仕於元所謂名不副其實也其書卷一至卷六爲金末諸人小傳卷七至卷十雜記瑣聞軼事卷十一

記哀宗亡國事卷十二記崔立作亂劫羣臣立碑
事而附以辨亡論一篇自是以至末卷皆其語錄
詩文及同時人投贈詩文其編次極有條理實非
隨得隨書者也後來修金史者亦頗取裁於是然
此書乃小說體不可以入雜史惟其論金一代之
盛衰興亡實爲確當足以備後世之殷鑒焉是書
元至正閒其鄉人孫和伯曾梓行之盧龍趙穆識
其後鮑淥飲得萊陽趙氏傳鈔本再假文瑞樓抱
經堂諸本校正付梓并爲之跋又於卷末續錄郝
經哀辭一篇王惲詩一首及補箋三則又月附錄
金史文藝傳王漁洋是書序錢遵王讀書敏求記

三篇及宋 定國 李 北苑 盧 文弼 三跋 武英殿聚

珍版亦收入之

山居新語四卷 知不足齋叢書本

元楊瑀撰

瑀字元誠杭州人天祿間擢中瑞司典簿後官至中奉大夫浙東道宣慰使都

帥 元 四庫全書著錄錢氏補元志 雜家類 亦載之是

書乃其於至正庚子致仕以後所作故曰山居新語前有楊鐵厓序稱其備古訓類說苑摭國史之闕文類筆語其史斷詩評繩前人之愆天畱人妖垂世俗之警視妖詭姪佚敗世教者遠矣今觀其書大致似陶南邨輟耕錄而所記亦頗不猥雜誠有益於世道有資於談柄有助於信史且有裨於

考證實非陶氏書所可及也未有自撰後序說郭
所載僅節錄本云

樂郊私語一卷

鹽邑志林本

元姚桐壽撰

桐壽字樂年睦州人順帝後至元中嘗爲餘干教授解官歸里至正中流

寓海鹽

四庫全書著錄倪氏補元志亦載之至正

年間寇亂相仍獨海鹽未遭兵燹樂年避居茲邑
而作是書因題曰樂郊私語其書凡三十一則皆
記當時軼聞瑣語以爲遣撥旅懷之計故多類小
說體然亦有可補史傳之闕者閒有辨證亦皆精
確後附楊鐵崖所作其兄大年椿壽墓志銘蓋欲
藉此書以傳人也書成於至正癸卯自爲之序前

又有沈孝徵篤福跋小引末有彭

遂昌山人雜錄一卷

讀畫齋叢書本

元鄭元裕撰

元裕字明德本遂昌人其父希遠徙錢唐元裕又流寓平江至正丁酉除

平江路儒學教授移疾去後七年復擢浙江儒學提舉

四庫全書著錄無

山人二字倪氏補元志

雜家類

俱同焦氏經籍志作

遂昌山樵雜錄此本作山人據錢遵王家影元鈔

本也明德生於有元中葉寓家平江見聞最廣所

述宋季遺聞及元代軼事凡四十六則極爲詳贍

頗足徵信其題遂昌山人者以示不忘本也末有

鮑渌飲跋稱其記西湖大佛頭耳竅可坐七人七

人蓋一人之譌也其說甚確說郭說海厯代小史

均節錄本云

農田餘話二卷

廣祿笈本

舊題長谷眞逸撰不著名氏 四庫全書存目其
書雜記瑣聞軼事而元末及張士誠竊據時事爲
多中述至正壬辰紅巾寇入杭丙申淮寇入姑蘇
事皆所親歷而又述及洪武甲寅乙卯之事蓋元
明間人也後有正德庚午蘇臺張翼南伯志一條
疑卽張氏所附益斷非原書所應有矣

輟耕錄三十卷

津逮祕書本

明陶宗儀撰

宗儀仕履見目錄類

四庫全書著錄明史藝

文志焦氏經籍志錢氏補元志俱載之是編前有

元至正丙午孫大雅

作序

乃南邨在元末所作故

稱明兵曰集慶軍曰江南游軍而入明後不追改耳南邨在元時未嘗出仕而多知朝章國典援引證辨頗有資於史乘下逮邨里膚言詩話小說種種錯見亦可以廣見聞釋疑滯未至有傷雅道其錄及王雪山質紹陶錄中栗里華陽二譜蓋取以自況也至所載發宋諸陵事殊多譌逸末有成化己丑華亭彭璋識語以訂補其未備焉歷代小史所載僅節錄一卷云

元氏掖庭記一卷

說郛本

明陶宗儀撰

是書雜記元一代官掖瑣事自世

祖至順帝凡二十五條敘述井然具有西京雜記遺意然所記頗不全備疑陶璜補入說邠時有所刪節非南邨之全書矣

水東日記四十卷

康熙中重刊本

明葉盛撰

盛字與中崑山人正統乙丑進士官至吏部侍郎謚文莊

四庫全

書著錄作三十八卷明史藝文志同是本多後二

卷爲其玄孫

恭煥

補刻也是編乃其巡撫宣府時

所作所記當代制度及前輩遺文軼事足爲史家徵信卽片言瑣語可助談麈者亦復采錄然徵引繁而議論夥其牴牾在所不免又好著己長創古今未有之例亦其一失惟其身歷三朝諳習掌故

而藏書又富終有根據究不同於道聽塗說也是
書始刻於常熟徐氏止三十八卷至萬厯癸丑恭
煥取家藏本校閱遺後二卷因補刻完之繫以識
語至國朝康熙庚申恭煥子方蔚又合舊鈔本
舊刻本參互讐勘重錄付梓又繫以跋

彭文憲公筆記二卷

顧氏四十家小說本

明彭時撰

時字純道號可齋安福人正統戊辰進士第一官至文淵閣大學士諡文憲

四庫全書存目作可齋雜記一卷乃其原書此

則後人改併耳是編凡三十六則皆述其生平閱
歷之事與明史本傳相合蓋作史者卽參證於是
書也借月山房彙鈔所收仍作一卷歷代小史說

郭續均節錄本云

方洲雜言一卷

普祕笈本

明張寧撰

寧字靖之號方洲海鹽人景泰甲戌進士官至給事中

四庫全

書存目其書凡十九則而自記登第一則獨詳其餘皆所記見聞之事以及雜說率瑣屑無緒提要所載浙江鮑氏藏本及二十餘則此本更少數則非足本也說郭續節錄數則而已

病逸漫記一卷

顧氏四十家小說本

明陸鈺撰

鈺字鼎儀崑山人天順癸未進士第二官至太常寺卿

四庫全

書存目無卷數其書凡七十五條皆記當代雜事雖傷於冗瑣而可以補明史志傳之闕者亦時有

之故在明人小說中尙爲翹楚其曰病逸漫記者
蓋鼎儀於弘治中引疾歸里而作也歷代小史說
郇續均節錄之

菽園雜記十五卷

墨海金壺本

明陸容撰

容字文墨號式齋太倉人成化丙戌進士官至浙江右參政

四庫

全書著錄明史藝文志焦氏經籍志

類制書

俱載之

其書多記當代朝野事蹟與史傳頗有出入而可
藉此以相參核中間辨證古義間有偏駁不足以
資考證又雜以談嘲瑣事殊爲猥雜取其大者舍
其小者可矣說郇續僅節錄一卷而已

野記一卷

歷代小史本

明祝允明撰

允明仕履見雜家類

四庫全書存目作四卷

乃其原本此本併爲一卷加以刪節僅存一百餘條所記明代事實獨詳於洪永自宣德以還寥寥數則而已然大都齊東之語不足以傳信也攷希哲別有前聞記一卷卽於野記原書中別撮爲一編而小更其次第殊無足取然則是本亦無足取可知矣

玉堂漫筆二卷

儼山外集本

明陸深撰

深仕履見雜史類

四庫全書存目焦氏經籍

志

制書類

作一卷蓋據未分卷之本也是編乃其官

翰林時所作故以玉堂爲名凡六十一條皆記當

代軼事并作舊聞雜說頗爲詳贍兼可以補史闕
巖山諸雜記中此其尙有可采者說郛續僅節錄
一卷云

金臺紀聞二卷

巖山外集本

明陸深撰

四庫全書存目焦氏經籍志

類制書

作

一卷據其未分卷之本也前有自序稱予忝登朝
史官偶有所得輒漫書之蓋自乙丑之夏訖於戊
辰九月錄爲二卷題曰金臺紀聞云云乃其正德
間在翰林時所作舉凡當代故事以及雜說皆爲
詳記亦玉堂漫筆之流亞也續祕笈僅節錄一卷
而已

春風堂隨筆一卷

儼山外集本

明陸深撰

四庫全書存目凡二十三條雜記古

今瑣事以及雜說皆無甚關係者後附歛硯志一篇頗詳云 廣祕笈說郭續均收入之惟陶本少一條耳

知命錄一卷

儼山外集本

明陸深撰

四庫全書存目乃其於嘉靖乙未赴

四川布政使任時途次所作凡二十條多記秦蜀山川名勝間及雜說大抵與前人遊記頗殊故入之小說焉當其初授陝西布政使時道經揚州蜀岡人謂由此可通蜀已而得入蜀之命故以名書

云續祕笈亦收入之

谿山餘話一卷 儼山外集本

明陸深撰 四庫全書存目是書蓋其謫官延平時所作凡十九則多述當時閩中名流軼事閒及典籍瑣說所記頗具端末足與史傳相參證 續

祕笈及陶 珽 補說鄒均收入之惟陶本少三則耳
顧豐堂漫書一卷 儼山外集本

明陸深撰 四庫全書存目凡七條皆雜記所聞見瑣事惟楊髡發宋諸陵一條爲論古事大都與春風堂隨筆相類乃其未成之書也

翦勝野聞一卷 顧氏四十家小說本

舊題明徐禎卿撰

禎卿字昌穀吳縣人弘治乙丑進士官國子監博士

四

庫全書存目明史文苑傳及藝文志俱不載千頃堂書目始載之其書凡四十四條皆記明太祖初起及洪武年間之事大都諸書所已詳所記頗近委巷之談似絕無學識者所爲昌穀亦何至於此也說郭續歷代小史均收入之

碧里雜存二卷

鹽邑志林本

明董穀撰

穀字碩甫自號碧里山樵海鹽人正德丙子舉人官漢陽縣知縣

四

庫全書存目其書凡八十五條皆雜記當代舊聞而於洪武時事尤詳然多荒唐不經之談閒論及典籍亦不免疏舛甚至以建文君爲眞出亡南岳

碑爲眞禹蹟洪武韻爲當遵用之類尤其大謬不然者也彙編亦收入之

孤樹哀談十卷

原刊本

明李默撰

默字時言臨寧人正德辛巳進士官至吏部尙書兼翰林院學士爲趙文華誣

陷下詔獄瘐死萬曆中追謚文愍

四庫全書存目焦氏經籍志

制書

亦載之千頃堂書目作趙可與撰

可與字念中安成人

正德癸酉舉人官福建鹽運司提舉

注云舊作李默撰誤也攷王漁

洋皇華紀聞三稱廣州老城內督糧道署西圃中

有管樹一株明太宰古冲李公默著孤樹裏談於

此樹下李公有記刻石嵌於樹今尙存據此知黃

俞邵以不誤爲誤矣其書編年紀載明代事蹟始

於太祖迄於武宗皆輯前人之說成帙每條注其
出處計所引書凡三十種大抵體近小說者錄之
多屬齊東之語無裨於史學也前有引用書目而
無序續說郛僅摘錄八條而已

東園友聞一卷

古今說海本

不著撰人名氏

四庫全書存目按明正德間華

亭孫景周

道昌

有東園客語一書皆錄名人嘉言

懿行及遷代聞見諸事於每條下各標其名凡三
十人皆元之遺老其書本五十帙散佚不全僅存
一卷作僞者卽剽剗其書改題此名陸思豫不知
而誤收之所載凡二十三條未知有所刪節否陶

所增說郭僅刪存十條歷代小史則刪存十六條云

明良記一卷

硯雲甲編本

舊題明楊儀撰

儀字夢羽號七檜山人常熟人嘉靖丙戌進士官至山東按察司副

使是書皆記明代雜事凡九十條而語多瑣屑不

經所誌諸帝后佚事尤涉鄙俚與世傳夢羽螭頭密語條例相同疑皆出於僞託故常熟志載其所著有南言集高坡異纂而無此二書也後有甌山金忠漳跋稱是記爲江陰李氏刪本非其原書云說郭續所收僅存十之三四矣

北窗瑣語一卷

硯雲甲編本

明余永麟撰

永麟鄞縣人嘉靖戊子舉人官蘇州府通判

四庫全書

存目無卷數蓋據天一閣藏本也是編凡分五十

四則多雜記舊聞軼事頗為詳贍而不免太失之

誣及品評詩文亦失證據故甌山金

忠澤

跋之謂

所載倭國貢使宋素卿原名朱臬及元永善事皆

與明史日本傳互有異同又淡紅衫子一詩相傳

為錢鶴灘作今改數字嫁名黃闕谷未知孰信若

夫革華傳唐人已辨其偽乃與毛穎傳同稱韓筆

何耶

觚不觚錄一卷

借月山房彙鈔本

明王世貞撰

世貞仕履見雜史類

四庫全書著錄是編前

有自序稱孔子有言觚不觚觚哉觚哉蓋傷觚之不復舊觚也閒居無事偶憶其事而書之大而朝典細而鄉俗以至一器一物之微無不可慨歎若今是昔非不觚而觚者百固不能二三也既成而目之曰觚不觚錄今觀其書凡六十則皆敘當代朝廷制度措紳儀注之沿革以傷今之不如昔也其記述多有端緒蓋皆就所閱歷者切實詳載雖傷於瑣屑而頗足以補史闕焉續祕笈說郛續均收入之

先進遺風二卷

彙祕笈本

明耿定向撰毛在增補

定向字在倫號楚侗麻城人嘉靖丙辰進士官至戶

部尚書諡恭襄 在字君明太倉人
萬厯甲戌進士官至大理寺右丞

四庫全書

著錄明史藝文志傳記亦載之攷焦氏經籍志傳記

類有定向維風編二卷注云記近代名公事當卽

是書後或改從今名歟其書皆纂輯明代賢士大夫嘉言懿行見於人倫日用酬應交際之常者自宋濂迄李謙凡五十六人皆以科第年代詮次故曰先進遺風所載不及朝政惟於操守品行之間三致意焉所以企往哲憫流俗欲挽頹風而返之古其意甚善其語甚具蓋爲當時士大夫諷也前萬厯己丑自序及君明序君明又做襄陽耆舊傳故事間增輯在倫行履分綴於後各注一附字以

別之復刻之河南而周世選爲之序說郭續僅節

錄一卷云

何氏語林三十卷 原刊本

明何良俊撰并注

良俊字元朗華亭人嘉靖中官翰林院孔目

四庫

全書著錄明史藝文志焦氏經籍志俱載之是書仿劉氏世說體例門目而作而其名則襲晉裴啟所著書名也所載昉自兩漢迄於元代正史所列傳記所存奇蹤勝跡漁獵靡遺凡二千七百餘事其原書所已見則不復出所有門目雖仿原書之舊而每門各有自序中間間有論斷則與原書迥異皆翦截舊文自成新製單詞隻句思致淵永誠

亦至理攸寓文學行義之淵也又仿劉孝標原書
注例而自引書以注之亦頗詳贍以肩隨二劉可
無媿矣前有嘉靖辛亥文衡山徵明序

世說新語補四卷

明刊本

舊題明何良俊撰補王世貞刪定 四庫全書存
目案元朗語林三十卷其體例門目雖因世說原
書而所載自漢迄元凡二千七百餘事而自爲之
注本非爲補世說而作亦非命名曰世說新語補
也吾鄉凌初成濠初既刻世說原本以復宋刊舊
第乃復取弇州所刪語林本改以今名刊附原書
之後前列人物以備詳其名字又列語林本所有

發題及舊序跋五篇凡例十則此則明人改刊舊書之通弊不足爲初成責也若提要之本乃康熙丙辰所刊前有富陽章紱序大約與此本無異云別本世說新語補二十卷通行本

舊題宋劉義慶撰梁劉孝標注宋劉辰翁批明何良俊增王世貞刪定王世懋批釋張文柱校注實卽弇州所刪何氏語林本而增入何氏原注又於書之上闌增入須谿麟洲兩家所有世說批語蓋文柱所定本也前仍刊弇州麟洲二序及舊序題跋五篇凡例十則後附語林釋名一篇

吳社編一卷續秘笈本

明王穉登撰

穉登字百穀吳縣人嘉靖中布衣

四庫全書存目

是編前有小引稱里社之設所以祈年穀祲災禱洽黨閭樂太平而已吳風淫靡喜訛尙怪每春夏之交妄言神降於是游手逐末亡賴不逞之徒張皇其事百戲羅列威儀雜遯是社之流生禍也又稱以不貲之財充無益之費神而有靈吾誰欺欺天平凡二目編成藏之齋中以消煩暑今觀其書凡十二則則備詳其會境會首助會接會以及雜劇樂部祭器散妝諸事欲使長民者知其爲民之害而嚴禁之也提要所載浙江孫氏藏本末有附顧文龍書而此本及說郛續所收則均無之矣

玉堂叢話八卷

海山仙館刊本

明焦竑撰

竑仕履見目錄類

四庫全書存目明史藝文

志亦載之前有萬厯戊午自題稱余自束髮好覽觀國朝名公卿事蹟迨濫竽詞林尤欲綜覈其行事以待異日之參攷每就簡冊中求之凡人品之淑慝注厝之得失朝廷之論建隱居之講求輒以片紙志之儲之巾箱頃年垂八十業置之不理矣相知者惜其嘗爲心思所及而廣之云云然則是書又爲其門人輩所編輯非盡出於一手也其書體裁仍之世說區分準之類林凡五十四類其末曰讐隙有感於所遭之二事而姑借以寓意也然

文格既極卑弱而所記諸人言行亦傷冗雜非特遠不及劉氏書卽何氏書亦難企而及之也前又有廬陵郭汝薦一鶚序

五茸志餘二卷

寫本

明唐之屏撰

之屏字君公華亭人萬厯壬辰進士官常山縣知縣是編雜錄

松江一郡軼聞瑣事格言諧語閒有類於詩話亦聊以助談資非爲談藝而設求其有關輿地者邈不可得故雖以地名書而入之小說家焉

嶠南瑣記二卷

硯雲乙編本

明魏濬撰

濬字蒼水自號湛羅山人松谿人萬厯甲辰進士官至右僉都御史巡撫湖廣

四庫全書存目蒼水官廣西提學道時嘗作西

事珥八卷敘述風土尙有碎事及續聞者合爲是編凡一百三十一條皆小說家言與西事珥之爲地志而設者固迥然不侔矣其所記亦頗沓雜不及西事珥之雅潔也前有萬厯壬子自序

汝南遺事二卷

借月山房彙鈔本

明李本固撰

本固字叔茂汝陽人萬厯進士官

四庫全

書存目叔茂修汝南志旣竣檢笥中尙有遺草棄之不無可惜迺撰次成帙以爲是編大都從羣書中采輯俱著其出處所錄史傳事蹟居多然而神仙鬼怪之談亦間出於其中究不脫小說習氣始知爲志所不收者蓋有由也前有萬厯己酉自序

剪桐載筆一卷

瀕洋著述本

明王象晉撰

象晉仕履見譜錄類

四庫全書存目其書前

有自序乃其奉使冊封惠王時所作故以剪桐爲名首載賀熹宗登極表一篇賀惠王陞位啟一篇以下凡十九篇皆傳贊賦解說記之文所述多嘉言美行而頗涉游戲究屬小說體也

雲間雜識八卷

寫本

明李紹文撰

紹文字節之松江人

四庫全書存目作雲間

雜記三卷舊本題明人撰不著名氏蓋據奇晉齋叢書本此乃足本而有撰人名氏者也明史藝文志有紹文明明世說新語八卷疑卽此書此書專記

松江一郡百年來瑣事異聞之有關世道者隨得
隨書卽事之前後亦所不論以視同時唐君公五
茸志餘之作猶魯衛也不過采擷之富倍於君公
耳然汰去其猥雜正復相等前有凡例及萬厯乙
卯宋自源懋澄王洪洲圻二序又有借洲等助梓
公啟助梓姓氏

敝帚軒餘談一卷 硯雲乙編本

明沈德符撰

德符字虎臣一字景倩秀水人萬厯戊午舉人

是書凡六十

四條皆雜記當時瑣聞瑣事頗屬猥鄙而大旨在
於垂戒尙不墮入惡道攷虎臣尙有敝帚軒牘語
三卷補遺一卷 四庫全書存目但其書皆雜記

神怪俳諧與此書稍爲不類未必卽其書之補遺耳

見聞錄八卷

眉公雜著本

明陳繼儒撰

繼儒字仲醇號眉公華亭人

四庫全書存目是

編前有自序乃其生平所作雜記之最鯨富者皆敘述當代士大夫軼事舊聞多可以補史書之闕間及掌故亦信而有徵其不書人之過惡者蓋本歐陽公歸田錄云惜其書零星雜碎尙少端緒耳

太平清話四卷

眉公雜著本

明陳繼儒撰

四庫全書存目其書所記皆古今

文獻翰墨元賞之事而援引舊事率多舛誤卽鑒

別書畫亦不能識真偽也前有萬厯乙未自序及

張元跋

晒序

玉堂舊記四卷

借月山房彙鈔本

國朝楊士聰撰

士聰字朝徹號鳬岫濟寧人明崇禎辛未進士官翰林院檢討入

國朝官至諭德

四庫全書存目其書皆記當時朝臣雜

事以補史官記注之闕所記頗有端緒惜其於愛憎取舍之間不免有黨同伐異之見究不足以彰直筆也且又備載戲笑不經之事以自穢其書亦無取焉前有崇禎癸未自序時值李自成攻破西安之日不一月而稱王不三月而亡明而玉堂中人尙掉弄筆墨如此有何益哉重鈔亦收入之

玉劍尊聞十卷

原刊本

國朝梁維樞撰

維樞字慎可真定人在前明由舉人官至工部主事

四庫

全書存目前有順治甲午自序稱自元以來數百年間雅言韻事幾同星鳳凡有聞見略類世說新語者分部書之簡素未敢參一己意隨所聞見卽書亦未得序時代之先後名位之崇卑今年慮其日久散失少爲刪益刻之都門然其名書之義未之言及豈玉劍二字乃其別號或齋名而配以尊其所聞之義歟其書一依臨川原目併全仿其文格唯自爲之注則又仿劉孝標注例也然是書不敘時代頗少條理而於明人狂誕之辭亦以爲佳

話而載之殊太不知簡擇矣卽所注亦極膚淺非
孝標引書爲注所可比擬也以視後來王丹麓今
世說可謂臭味無差池矣此書原闕捷悟自新二
類錢仲芳菜吳梅邨偉業二序均未之言蓋其作
序時尙未闕爾

五茸志逸四卷補四卷

寫本

國朝吳履震撰

履震字退菴華亭人

是編專記松江一郡軼

事凡耳聞目見及涉獵地志小說有可參廟謨可
資騷壇可排孤憤可助揮塵可供捧腹者無不搜
輯而獨於今人今事足爲懲往毖來厯厯可參證
者尤在所略俱隨筆劄記絕無倫次僅分爲二編

前編在明季時作有自序凡例及王昌張家璧沈

新之盛國芳唐孟融五序後編入國朝後作有

康熙乙巳何竹序大旨與唐君公五茸志餘相類

而詳幾十倍之矣

印竹杖七卷 留髡堂刊本

國朝施男撰 男字偉長吉水人順治初隨征廣西以軍功授廣西按察司副使

四庫全書存目其書凡分四類前三卷雜記峒黎

風土各繫以詩皆其官桂林時所作第四卷第五

卷雜記江浙吳楚間名勝亦各繫以詩皆其遊覽

時所作第六卷爲其詩集第七卷惟錄劉客生 湘

客楊伯祥 廷麟 劉無文 大樸 劉天孫 日襄 倪鴻寶

元璐

五人之詩每類各有自作弁言此書似小說而不皆屬小說似別集而不皆屬別集所作皆詞意纖佻尙沿公安竟陵之末派而又不諳著作體例則竟是一無可取之書耳前又有來集之文德

翼李來春徐世溥四序

汪氏說鈴二卷

寫本

國朝汪琬撰

琬仕履見禮類

惠棟補注

棟履貫見五經總義類

是書

皆記同時人瑣言碎事以及詩話凡一百十三條略仿世說之體頗存古意前有自序及題王西樵士祿亦爲之題末有王漁洋士禎跋其書間有自注松厓復爲詳注同時人仕履時事又引古今人

書以補注之亦極詳贍然鈍翁書本屬閒言語松
厓以樸學之士而從事於此亦可謂用心於無益
之地矣其不付諸梓人良有以也吳門黃蘗園
不烈得同郡蔣氏賜書樓藏本手校其誤并跋其後
又有戴先曾跋至鈍翁原書近無錫劉堅所編漁
洋說部精華曾取以附刊其後云

皇華紀聞四卷

漁洋著述本

國朝王士禎撰

士禎仕履見傳記類

四庫全書存目康熙

二十三年漁洋奉

命祭告南海道途所經都邑

地理山川人物與夫荒冢伏莽之遺蹟鳥獸草木
非常可喜之奇怪搜討摺摭萃爲是編然采之地

志小說之文爲多不足以正往事之誣以備史氏之采擇如他所筆記諸書也前有韓慕廬葵及其從子源二序

隴蜀餘聞一卷

漁洋著述本

國朝王士禎撰 四庫全書存目先是康熙壬子漁洋奉 命典試四川有蜀道驛程記二卷越二十五年丙子復奉 命祭告西嶽西鎮江濱有秦蜀驛程後記二卷又記隴蜀瑣碎之事爲是書以其皆非前後驛程記所有故曰餘聞凡一百十餘條所記雖近小說然足以補兩記之遺而爲修地志者所取材矣 昭代叢書說鈴均收入之

今世說八卷

袖珍本

國朝王暉撰

暉字升麓
仁和人

四庫全書存目前有康

熙癸亥自序稱世說新語一書纂自南宋多摭晉事

而兼及於漢魏今 朝廷右文名賢輩出闕閱才

華遠勝江左其嘉言懿行史不勝載特未有如臨

川哀聚而表著之予志此有年上自廊廟縉紳下

及山林隱逸凡一言一行有可采錄率獵收而類

紀之稿凡數易厯久乃成今觀其書條目俱遵世說

原編惟自新黜免儉嗇說險紕漏仇隙諸事不及

備列其於時人言行止據所見諸集輯成而於陸

麗京

圻

西陵新語采拾頗多並爲詳注爵里以及

生平大略其遺詞命意無不步趨臨川未免逐形而失影而稱許太嫌過分亦涉標榜之習中又載及其父實行二條託言皆同人從誌傳采入故名字稱謂一從本文尙說得去至載入已事亦託言向承四方諸先生贈言頗多獎借同人卽爲節取張列集中恐不足以解免也蓋丹麓聊借此以交通聲氣無暇顧及體例之乖迕其去劉氏書誠不可以道里計矣前又有自撰例言及毛際可嚴允擊徐鳳喈馮景丁彭五序并同人評林十三則

漱華隨筆四卷

借月山房彙鈔本

國朝嚴有禧撰

有禧字韋川常熟人

是書乃其奉諱里居鍵

戶謝客時所記錄凡一百三十餘則皆記近代微言瑣事以及掌故間及因果報應卷帙不餽而語皆微實蓋其慎也又其大旨均歸懲勸蓋與尋常小說家異矣前有乾隆壬申安平陳法序

制義科瑣記四卷

函海本

國朝李調元撰

調元仕履見四書類

我

朝承前明之法以

八股選士自鄉試會試而至

殿試由前明以迄

於今幾五百年儲材養士之厚率舊作新之制文人學士多喜談而樂道之其雜載於高文典冊稗官野史之內者未易悉數雨邨因隨見摘鈔自明洪武迄崇禎爲三卷 本朝順治康熙爲一卷共

一百七十六條彙成是編垂爲制科雅話以鳴盛事亦以見國家待士之隆也雖所記間涉神怪然皆科名中事尙不惡道惜其不著出處是其一失耳卽如卷四正副考試官王者臣注云者臣子門人夫以康熙丙子科考官而作乾隆癸未進士之門人難免葛龔之誚矣亦由其不著書名也前有乾隆戊戌自序引及或說稱八股取士之制創於元云云則大謬也

茶餘客話十二卷 七錄齋活字版本

國朝阮葵生撰 葵生字寶誠號唐唐山陽人乾隆壬申舉人官至刑部右侍郎唐
山官京師最久藏書最富凡所得於載籍以逮見

聞所及輒誌於冊積二十年成三十卷所記自經史及國朝典故淮陰事故下及書畫禽魚之類靡不講貫精核獨出以己見論斷而折衷之多有未經人道爲說部諸家所不及者其書未及付梓而歿吾邑戴蕝塘路爲選定是編閒附案語以活字版印行前有吳江楊復吉題詞末有其子鍾琦及蕝塘二跋藝海珠塵亦收入之

淡墨錄十六卷

函海本

國朝李調元撰是編所紀皆本朝甲乙丙榜諸名臣之言行及科場之條例兼徵軼事奇聞自國初起每科俱按題名碑錄科分前後而康熙己

未乾隆丙辰兩舉鴻博辛未一舉經學得人尤盛
亦併逐一搜羅詳爲考釋足以備詞林之典故續
玉堂之佳話焉其曰淡墨錄者用唐人以淡墨書
榜人名故事云書成於乾隆乙卯自爲之序後之人
繼是編而續之當斷自嘉慶改元始矣

槐廳載筆二十卷

原刊本

國朝法式善撰

法式善仕履見傳記類

時帆官翰林學士時

曾輯錄科場貢舉官職姓氏編年系地爲清祕述
聞一書後改官祭酒復博采科名故實見於官書
及各家撰著足資攷據者仿朱氏日下舊聞體例
分門十二曰規制曰恩榮曰盛事曰知過曰掌故

曰紀實曰述異曰炯戒曰品藻曰夢兆曰因果曰
詠歌題曰槐廳載筆蓋國子監廨舍祭酒所視事
處庭中古槐植自元時以許魯齋得名故以名書
非翰林院第三廳故事也是書與清祕述聞相表
裏述聞爲經而此編爲緯也自序稱言必求其有
當事必期於可徵云云然所輯述異夢兆因果三
門俱屬異聞雖所徵引具有成編究爲全書之累
矣前又有嘉慶己未例言及徵引書目補目錄

鄭堂讀書記卷六十六

烏程周中孚撰

子部十二之四

小說家類四

異聞

穆天子傳六卷

平津館叢書本

晉郭璞注

璞仕履見術數類

四庫全書著錄隋志

起居注類

新舊唐志

起居注類

讀書志

傳記類

書錄解題

起居注類

通攷

宋志

別史類

俱載之乃晉太康二年汲縣民盜發魏

襄王墓中所得竹書也記周穆王遊行四海見帝

臺西王母暨美人盛姬死事有月日而無年又文

多斷缺荀勗和嶠等以隸字寫之勗序稱春秋左氏傳曰穆王欲肆其心周行天下將皆使有車轍馬跡焉此書所載則其事也王好巡狩得驊騮綠耳之乘造父爲御以觀四荒北絕流沙西登崑崙與太史公記同汲郡收書不謹多毀落殘缺雖其言不典皆是古書頗可觀覽晁氏稱郭璞注本謂之周王遊行記陳氏稱其體制與起居注正同起居注者自漢明德馬皇后始漢魏以來因之以上陳說然其事爲經典所不載惟列子周穆王篇所載頗有相同景純注最在先頗引奇聞異說蓋亦就書而注與山經注同科非注爾雅之可比也筠軒懼

是書之荒落因取漢魏叢書各本暨史漢諸子唐
宋類書所引互相參校表其異同正其舛謬爲補
正文及注若干字刪若干字改若干字其無可校
證者闕之書成寄正孫淵如師刻入叢書從此穆
傳郭注莫善於此本矣前又有元至正庚寅北岳
王元翰漸序及筠軒校正序後有附錄九則

神異經一卷

漢魏叢書本

舊題漢東方朔撰晉張華注

朔字曼倩平原厭次人武帝朝官太中大夫

給事中免復爲中郎華仕履見譜錄類

四庫全書著錄隋志

地理類

作一卷書錄解題通考俱同舊唐志

地理類新唐志

道家類

崇文目宋志俱作二卷而崇文目又重載於

地理類其書凡東荒經九則東南荒經五則南荒經十則西南荒經三則西荒經八則西北荒經六則北荒經三則東北荒經一則中荒經十則大抵仿山海經爲之漢志及本傳皆不載朔有是書卽晉書華傳亦不言其注是書則其均爲後人所依託矣所記皆八荒以外之言不可究詰而文格雅近齊梁間人所爲故辭采過於縉麗頗便詞章家所取資特於地理道家均無當也說郛亦收入之

海內十洲記一卷

漢魏叢書本

舊題漢東方朔撰

四庫全書著錄隋志

地理類止

作十洲記舊唐志

地理類

新唐志

道家類

崇文日

地理類

讀書志

傳記類

書錄解題通考俱同宋志

道家類

作十

洲三島記蓋誤衍二字也其書首稱漢武帝既聞王母說八方巨海之中有祖洲瀛洲玄洲炎洲長洲元洲流洲生洲鳳麟洲聚窟洲有此十洲乃人跡所稀絕處又始知東方朔非世常人是以延之曲室而親問十洲所在所有之物名故書記之云云其書每洲各一條又次以滄海島方丈洲扶桑蓬邱崑崙五條皆神仙恍惚之說又漢志及本傳所不載當與神異經爲六朝人一手所假託也然其文辭豐縟雖無裨於輿地實有助於文章云說邪廣祕笈均收入之

別國洞冥記四卷

漢魏叢書本

舊題漢郭憲撰

憲字子橫汝南宋人官至先祿勳

四庫全書著

錄作漢武洞冥記據其原序止作洞冥記四卷其

有漢武二字及別國二字者皆後人所加爾隋志

雜傳

舊唐志

雜傳

俱作一卷新唐志

道家

宋志俱

作四卷讀書志

傳記

作五卷書錄解題通考俱作

四卷又拾遺一卷案隋唐志作一卷當據不分卷

之本晁氏作五卷當有拾遺一卷在內陳氏稱其

別錄

指拾遺

又於御覽中鈔出然則四卷亦非全書

也今則拾遺一卷已佚惟相傳之四卷存其序言

漢武明雋特異之主東方朔因滑稽浮誕以匡諫

洞心於道教使冥跡之奧昭然顯著故曰洞冥其書凡六十條以上序說皆荒誕不可詰又詞華豔麗亦不類東漢之文當屬六朝人所依託故唐人始采用之也說郛普祕笈所收均節錄一卷云

漢武故事一卷 說海本

舊題漢班固撰 固仕履見正史類 四庫全書著錄隋志

舊事類 舊唐志 故事類 新唐志 故事類 俱作二卷皆不注

班固撰崇文目 雜史類 始釋云班固撰本題二篇今

世誤析為五篇 見玉海引 讀書志 傳記類 作二卷 此據袁本今新

刊備本誤 作一卷 云世言班固撰唐張柬之書洞冥記後

云漢武故事王儉造通考傳記同宋志作五卷題

班固撰蓋據當時誤析本竊謂東之尙屬初唐人其言王儉撰當有所受之或不誣也錢遵王讀書敏求記所載二本皆作二卷謂一是錫山秦氏操繡石書堂本與新刻頗異一是陳文燭晦伯家本又與秦本互異今兩存之然遵王所藏二本今皆未見此本僅十頁必非當日二卷五卷之原本所記多出入史漢而更傳益以妖妄之語其諸書所引此本反多不載疑宋時之本已亡此又爲後人鈔合而成其非王儉原書斷可知已歷代小史亦收入之

舊題漢班固撰 四庫全書著錄隋志雜傳類作漢

武內傳三卷舊唐志雜傳類作漢武帝傳一卷俱不

注班固撰讀書志傳記類作二卷云不題撰人記王

母降通考傳記同宋志傳記類亦作二卷注云不知

作者是本題爲固撰殆後人以漢武故事託名于

固併舉是書歸之斗胡元瑞四部正譌下謂詳其文

體是六朝人作蓋齊梁間好事者爲之也所載諸

仙女名諸家多用上元夫人蓋本此阿環上元名

案元瑞以爲齊梁間人作殊爲不確今證以諸書

所引其書蓋出於魏晉之間且文體雅與王子年

拾遺記相同然有諸書所引而爲今本所無者亦

頗繁多則此本又爲明人所刪節故止有十五六頁斷未能如諸家所載可分爲二卷三卷也知其非當日之完帙矣說郛墨海金壺均收入之

搜神記二十卷

津逮祕書本

舊題晉干寶撰

寶字令升新蔡人徙嘉興召爲著作郎

四庫全書

著錄隋志舊唐志

雜傳類

新唐志

小說類

俱作三十卷

通志

傳記類

同崇文目作搜神總記十卷釋云不著

撰人名氏或題干寶撰非也宋志作干寶搜神總

記十卷寶續記十卷注云並不知作者然讀書志

書錄解題俱不載疑其書宋時已佚故崇文目所

載已較隋唐志少二十卷且云非干寶撰而宋志

既有總記又有續記既冠以干寶二字又注以不知作者恐未見其書而虛列之耳此本所載證以古書所引或有或無當屬宋以後聯綴舊文而以他說增益成帙非當時之原書也故於第六卷乃全鈔兩漢書五行志而續以晉書五行志中三國事一字不更其依託之顯然者也然核其體例儼然古籍不與他僞書等蓋由其人本有學識善於作僞若非細心搜討無從知其僞也前有令升原序卽晉書本傳所載者學津討原亦收入之漢魏叢書所收止八卷與此本大同小異疑別一僞本也鹽邑志林本總作二卷說郛僅摘錄十八條云

搜神後記十卷

津逮祕書本

舊題晉陶潛撰

潛仕履見類書類

四庫全書著錄隋志

雜傳類

通志傳記俱載之新舊唐志崇文日讀書志

書錄解題通考宋志俱不載豈皆未見其書歟然淵明亦非撰是書者書中載有宋元嘉十四年十六年事是時淵明已卒十餘年矣況宋書本傳稱其所著文章皆題其年月義熙以前則書晉氏年號自永初以來唯云甲子而已其於文章如此則於此記亦當如是而竟不然其作偽之明證也惟其所記詞致雅飭體例嚴整實非鈔撮補綴而成當由隋以前人所依託與世所傳干氏搜神記固

迴然不侔矣學津討原亦收入之說郭唐宋叢書

均節錄一卷云

拾遺記十卷

漢魏叢書本

秦王嘉撰

嘉字子年隴西安陽人能前知為姚萇所殺苻登贈太師諡曰文舊本題晉代

非也

四庫全書著錄隋志

雜史類

作拾遺錄二卷新

舊唐志

雜史類

俱作拾遺錄三卷又拾遺記十卷注

云蕭綺錄崇文目

傳記類

讀書志

傳記類

書錄解題通

考宋志俱作拾遺記十卷蓋子年撰而綺敘錄故

二唐志俱分載也據綺序知王氏書本十九卷二

百二十篇經亂佚闕綺掇拾殘文編為十卷併為

之錄錄即論贊之別名也然則隋唐志所載二卷

三卷之本亦非子年之原書矣所記上起三皇下迄石虎事跡奇詭十不一真徒以辭條豐蔚頗有資於詞章至綺所論斷雖爲暢達亦不過揚其頽波耳祕書少一種亦收入之歷代小史所收有記無錄說郭僅節錄一卷云

異苑十卷 津逮祕書本

宋劉敬叔撰

敬叔彭城人元嘉中官給事黃門郎

四庫全書著錄

隋志

雜傳類

通志傳記俱載之新舊唐志崇文目讀

書志書錄解題通考宋志俱不載豈皆未見其書歟是書所記皆古今怪異之事脩詞命意頗有古致無唐以下小說冗沓之習當屬劉氏原書而毛

子晉跋之稱是書載秦世謠而不及仲舒修履之
奇載高陵龜而不及毛寶鑄印之驗陳仲弓德星
可采而客星犯座胡以獨遺沙門慧熾真奇而佛
圖澄豈容盡逸至於絡絲之女鞠通之琴及郭璞
韓友杜不愆輩種種興趣悉不一收不知敬叔意
何居也余謂怪異之事固聖人所不語後人喜談
此事皆著書以紀所聞是書亦幾備矣而子晉猶
以爲未備勢必如洪景廬夷堅志多至四百二十
卷而後可子晉之言余未敢以爲然也學津討原
亦收入之說郭唐宋叢書均節錄一卷而已

續齊諧記一卷

漢魏叢書本

梁吳均撰

均字叔庠安吉人天監初柳惲爲湖州刺史辟爲邵主簿或作唐吳筠誤也

四庫全書著錄隋志

雜傳類

舊唐志

雜傳類

新唐志

書錄解題通志傳記宋志俱同崇文目作三卷通考作二卷皆字之誤也案隋志新舊唐志宋散騎侍郎東陽無疑先有齊諧記七卷故是書稱續齊諧志怪本莊子語也既以名書宜其所記十七條皆屬異聞矣然唐人皆已引用亦小說之最古者惟宋徐子光注李氏蒙求劉阮天台語其所引之文此本無之豈其書已佚後人采摭他書所引以成帙故不免有所遺歟末有元至元甲子吳郡陸友跋說郛祕書二十一種均收入之

龍城錄二卷

河東集附刊本

舊題唐柳宗元撰

宗元字子厚河東人貞元九年進士又中博學宏詞科十九年

爲監察御史襄行順宗朝擢禮部員外郎坐黨王叔文貶邵州刺史再貶永州司馬移柳州刺史

四庫全書存目新唐志崇文目讀書志通志俱不載書錄解題通考宋志始載之俱作一卷蓋據單行本也宋葛嶠始編之集中以後編集者皆從之爾陳氏云龍城錄稱柳宗元撰龍城謂柳州也羅浮梅花夢事出其中唐志無此書蓋依託也或云王銍性之作何氏春渚紀聞朱子語錄亦皆稱王銍所僞作今觀其書前有小序凡四十三則其文字固不類于厚而所載多神異之事似從後人

詩文中暗影出其爲性之所僞託信矣然古今詞人皆以爲柳氏書而引用不絕則亦莫得而廢之焉百川學海說郛歷代小史所收均作一卷云

集異記一卷

祕書二十一種本

唐薛用弱撰

用弱字中勝里貫未詳題曰河東蓋郡望也長慶中官至光州刺史

四庫全書著錄新唐志崇文目通志

類傳記

俱作三

卷讀書志通考俱作二卷宋志作一卷與今本同

其作三卷二卷者皆所據本異也晁氏稱是書集

隋唐間談詭之事一題古異記首載徐佐卿化鶴

事余謂所記凡十六篇序述詳贍而自成章絕無

鄙倍之習間涉靈異亦小說之恆態耳說郛唐宋

叢書歷代小史均收入之

前定錄一卷續錄一卷

學津討原本

唐鍾輅撰

輅里貫未詳太和中官崇文館校書郎新唐志作鍾輅無從攷定以何字爲正

也

四庫全書著錄新唐志崇文目書錄解題通

志通考宋志俱載之崇文目又有續一卷亦作輅撰通志則作廣前定錄廣或續字之譌中引王性之所撰僞本龍城錄疑爲後人所竄易也唐志宋志俱作一卷蓋總言之爾陳氏稱是書凡二十事別本又有續錄二十四事今觀是書悉與之合尙屬宋人相傳舊本前有自序云太和中雖書春閣秩散多暇時得從博聞君子徵其異說每及前定

之事未嘗不三復本末提筆記錄因編次之曰前
定錄庶達識之士知其不誣而奔競之徒亦足以
自警以上序說蓋其著書之旨本爲勸戒起見故
異於他小說也續錄所記雖略然其大旨亦不外
是說郢百川學海所收俱題鍾惺撰唐宋叢書止
收前定錄一卷云

甘澤謠一卷

津逮秘書本

唐袁郊撰

郊字子乾官至魏州刺史

四庫全書著錄新唐志

讀書志書錄解題通考宋志俱載之晁氏稱是書
載謠異事九章咸通中久雨臥疾所著故曰甘澤
謠陳氏稱咸通戊子自序以其春雨澤應故有甘

澤成謠之語遂以名其書以上陳說然原本久佚
後人從太平廣記錄出所記雖皆異聞而具有端
末頗於考證有裨中有圓觀事一則此本因附錄
東坡刪改圓澤傳并跋贊寧記觀道人三生爲比
邛篇前有明楊儀重校序末有五川居士跋不著
名氏又有毛子晉跋說郛唐宋叢書學津討原均
收入之

劇談錄二卷

津逮秘書本

唐康駢撰駢字駕言池陽人乾符四年登進士第
官至崇文館校書郎此本題作宋人誤
也攷諸書康或作唐駢
或作駢亦皆傳寫之誤
四庫全書著錄新唐志
讀書志通志通攷宋志俱作三卷惟崇文目作二

卷與今本同蓋後人所合併也其書凡四十二則咸載唐世故事間附以議論所記頗極詳贍而多涉神怪不經故皆采入太平廣記或原書已佚後人反從廣記錄出也末有毛子晉跋學津討原亦收入之

杜陽雜編三卷

學津討原本

唐蘇鶚撰

鶚仕履見雜家類

四庫全書著錄新唐志讀

書志書錄解題通志通考宋志俱載之宋志作二卷字之誤也是書所記唐代異聞自代宗廣德元年迄於懿宗咸通十四年凡五十二則長篇大章居多其文詞俱極瓌麗與郭子橫洞冥記王子年

拾遺記相等而誇飾荒誕亦復相似雖皆注其聞
於某某乃諉過於人之意而後人反以其不沒人
善稱之真被古人瞞過也以其家於武功之杜陽
川故名其書曰杜陽雜編舊傳其皆以三字爲標
題而此本無之卽說郭厯代小史所收亦皆無之
不知據何本而云然也

開天傳信記一卷 百川學海本

唐鄭棨撰

棨字蘊武棨陽人登進士第昭宗時官至禮部侍郎同中書門下平章事

四庫全書著錄新唐志

雜史類

崇文目

雜史類

讀書志

雜史類

書錄解題

雜史類

通考

雜史類

宋志俱載之是書

乃其官吏部員外郎時所作前有自序稱國朝故

事莫盛於開元天寶之際服膺簡策管窺王業參
於聞聽或有闕焉承平之盛不可殞墜輒因簿領
之暇搜求遺逸傳於必信名曰開天傳信記今觀
其書凡三十條皆記開元天寶間傳聞之事間有
失實又如華陰岳神夢遊月宮及盧公遠葉法善
諸事尤不足以傳信以文士久相引用今亦不得
而廢之焉說郛歷代小史學津討原均收入之

集異志四卷

續祕笈本

舊題唐陸勳撰

勳里貫未詳
官比部郎中

四庫全書存目作

陸氏集異記所以別於薛氏書也讀書志通考宋
志俱作二卷晁氏稱語怪之書也凡三十二事言

尤怪者居三十之一案今所載凡二百二十六事較晁氏所計之數多至五六倍而言尤怪者甚少蓋後人又采諸傳記中所載戰國以迄唐初怪異之書傅益爲四卷非宋人所見之舊帙矣

博異記一卷

祕書二十一種本

舊題唐谷神子撰不著名氏 四庫全書著錄新唐志作谷神子博異志三卷崇文目同讀書志書錄解題通考宋志俱作博異志一卷晁氏云題曰谷神子纂序稱其書頗箴規時事故隱姓名或曰名還古而竟不知其姓志怪之書也陳氏云稱谷神子不知何人所記初唐及中世事案是書自序

鄭記六十六

稱余放志西齋從宦北闕因尋往事輒議編題類
成一卷非徒但資笑語抑亦麤顯箴規或冀逆耳
之辭稍獲周身之誠只求同已何必標名是稱谷
神子則其書本不標名而胡元瑞二酉綴遺因晁
氏有或曰名還古一語而證成爲晚唐詩人鄭還
古眞所謂必求其人以實之則鑒矣其書所載敬
元穎以下十人之事皆鬼神靈跡詞頗雅贍蓋猶
能文之士所爲惟其自謂麤獻箴規云云與所載
十事不合蓋唐志崇文目之作三卷乃其原本其
書已佚後人從他書中鈔合爲一卷蓋多語怪之
類而所有觸忌之條皆在所佚之列又改自序中

三卷爲一卷以相符合耳舊皆作志而此本作記
當爲汪士漢妄改之說郭唐宋叢書所收俱作志
也然俱題鄭還古姓名疑說郭爲陶珽所補入故
因胡元瑞所考而改題之叢書則惟陶是從耳

桂苑叢談一卷

續祕笈本

舊題唐子休馮翊撰不著名氏 四庫全書著錄
新唐志所載注曰馮翊唐子休撰不知陳眉公刊
時何以顛倒其文也是書前十條皆載唐代神怪
之事雖爲詳明而太涉瑣屑後爲史遺十八條皆
記南北朝及唐代雜事亦小說之類不足以當史
之遺也說郭所收本較此本少七條而止題曰唐

馮翊蓋誤以此二字爲姓名耳

劍俠傳四卷

祕書二十一種本

不著撰人名氏 四庫全書存目作二卷舊本題

爲唐人撰乃據明吳琯琯古今逸史本此本蓋汪士

漢所分也唐宋史志諸家書目俱不載其書凡三

十三篇皆記古今劍俠之事其采自太平廣記第

一百九十三卷至一百九十六卷豪俠一門者計

十九篇皆唐代事內只夫餘國主篇亦可屬隋所不

采者如老人化猿篇爲越事虬鬚叟篇爲唐事韋

洵美篇爲梁事其餘十一篇皆宋事也大都南宋

末人采錄廣記所載而附益以他書改題是名士

漢序稱所記載則自越隋外俱稱引唐事後人以爲唐書理或然歟云云若未目覩此書者然甚可笑也說郛所收止一卷凡十一篇題唐亡名氏撰以其皆唐事云

唐闕史二卷

知不足齋叢書本

唐高彥休撰彥休自號參寥子里貫未詳鄂岳觀察使錯之從孫唐亡時年甫三十一至晉開運初尙在四庫全書著錄新唐志宋志俱止作

闕史三卷書錄解題通考俱作唐闕史三卷而宋志又重載闕史一卷注云參寥子述蓋不知參寥子卽彥休也前有甲辰歲卽晉開運元年自序稱共五十一篇分爲上下卷約以年代爲次則作三卷者皆

相承之誤作一卷者又誤以冊爲卷其標題有唐
字者出於後人所加耳彥休爲唐末遺民故作是
書不繫以唐字而自序但書甲子亦不繫以晉之
紀年所記雖皆怪妄之事而具有端末多足以參
證史傳其篇後多繫以斷語持論亦頗不苟蓋志
怪之書之近正者也未有宋黃伯思明祝允明二
跋冠以乾隆甲午御題詩一章

錄異記八卷

律逮祕書本

蜀杜光庭撰光庭字賓至縉雲人一日長安人咸
通中應九經舉不第入天台山學道
從僖宗幸興元留蜀事先主爲金紫光祿大夫諫
議大夫封蔡國公賜號廣成先生遷戶部侍郎後
主立授道籙於苑中以爲
傳真天師崇真館大學士
四庫全書存目崇文

目及宋志俱作十卷白雲霽道藏目錄詳注

記傳類

作八卷與今本同前有自序凡分十七類曰仙曰異人曰忠曰孝曰感應曰異夢曰鬼神曰龍曰異虎曰異龜曰異鼃曰異蛇曰異魚曰洞曰異水曰異石曰墓雖皆荒誕之言然實小說之類與道家無涉以其撰自羽流故收入道藏耳後人以言屬無稽目爲杜撰蓋因賓至而起云末有正德己卯柳僉跋並詩與俞弁和詩又有趙清常跋說郭僅節錄一卷而已

稽神錄六卷拾遺一卷

津逮祕書本

宋徐鉉撰

鉉仕履見小學類

四庫全書著錄崇文目宋

志俱作十卷讀書志書錄解題通考俱作六卷陳氏稱元本十卷今無卷第總作一卷當是自他書中錄出者案陳氏既標爲六卷又謂總作一卷竊所未喻其言自他書錄出者蓋原書已佚後人從太平廣記錄出耳晁氏引其自序稱自乙未歲至乙卯凡二十年僅得百五十事以上晁引而此本反多二十四事又有拾遺十三事當又誤錄他書併入之故數浮於舊也其書皆記唐末五代異聞尙在南唐所作楊大年謂其據門下士蒯亮所言見晁氏引恐不盡然學津討原亦收入之說郭僅摘錄七條云

江淮異人錄二卷

函海本

宋吳淑撰

淑仕履見類書類

四庫全書著錄崇文目

記傳

類

宋史本傳及藝文志俱作三卷惟書錄解題

史偽

類

作二卷通考偽史同陳氏稱所記道流俠客術

士之類凡二十五人然世鮮傳本今館臣從永樂大典錄出釐爲二卷以復陳氏之舊所載凡唐代二人南唐二十三人其數與陳氏說同仍屬完帙雖皆語怪之流而其事尙爲史傳所恆有則亦非盡無稽也李雨邨依大典本付刊并爲之序知不足齋叢書則據明嘉靖中伍光忠本稍經潤色未失其眞然終不及是本之尙屬原書也說郛僅節

錄二條更不足道矣

太平廣記五百卷目錄十卷

明刊本

宋李昉等奉敕撰

昉仕履見類書類

四庫全書著錄讀

書志書錄解題通考宋志俱載之按太平興國二年詔學士李昉扈蒙等十三人同修太平御覽又取野史傳記故事小說列撰集一書明年告成先御覽而表進之賜名太平廣記六年詔鏤版頒行言者以廣記非後學所急收版藏太清樓於是御覽盛傳而廣記反不行於當代雖以鄭漁仲之博識亦未嘗得而見之矣其書分五百十五部每部又各分人物名目所引書至三百四十四種奇文

祕笈咸在於斯凡侈談神怪者尤搜羅靡遺實小說之總匯也此本表文後有明嘉靖丙寅談愷識語稱是記傳寫已久亥豕魯魚甚至不能以句因與二三知己互相讐校字義稍定尙有闕文闕卷以俟海內藏書之家慨然嘉惠補成全書云云故其書尙闕嗤鄙類二卷無賴類二卷輕薄類一卷及酷暴類胡澍等六事婦人類李誕等七事迄今亦無從據以補焉前又有引用書目當屬原本所有云

茅亭客話十卷

津逮祕書本

宋黃休復撰

休復字端本蜀人題曰江夏舉郡望也

四庫全書著

錄讀書志書錄解題通考宋志俱載之晁氏稱茅亭其所居也暇日賓客話言及虛無變化謠俗卜筮雖異端而合道旨屬懲勸者皆錄之今觀其書凡八十九條所記皆蜀中軼事自前後蜀以迄宋眞宗時涉神怪者居多何道旨之可合然以言乎屬懲勸則有之矣其他雜說尙可以資博識猶小說之近理者也學津討原亦收入之說郭僅節錄數條而已

五色綫二卷

津逮祕書本

不著編輯者名氏 四庫全書存目後有毛子晉跋云攷中興館閣書目稱不知作者摭百家雜事

記之爲類門舊跋亦不著年月姓氏因披閱所載多祕藏異蹟雖不逮容齋五筆亦迥出雲仙諸冊矣今觀是書皆引諸雜記中新穎怪誕之說而摘取數字各爲標目且不盡注出處其體例頗類陶秀實清異錄而割裂舛謬頗無條理則不及陶氏書遠甚恐非宋人之舊帙耳說郛僅節錄一卷云

陶朱新錄一卷

墨海金壺本

宋馬純撰

純字子約自號樸樵翁武城人紹興中官江西漕使隆興初以太中大夫致仕

四庫全書著錄倪氏宋志補亦載之前有紹興壬戌自序所載凡七十七條皆當代瑣聞雜事然語怪居多閒及雜說不過十之二三其末一條爲

元祐黨籍碑蓋黨籍中馬默卽子約之祖父故附及之以昭先烈雖與全書體例不類不恤也其曰陶朱新錄者子約後居越之陶朱鄉因以名書說郛所收乃節錄本云

夷堅志二十卷

耕煙草堂袖珍本

宋洪邁撰

邁仕履見史鈔類

四庫全書著錄作夷堅支

志五十卷書錄解題作夷堅志甲至癸二百卷支甲至支癸一百卷三甲至三癸一百卷四甲四乙二十卷大凡四百二十卷通考同讀書附志作夷堅志四十八卷宋志作夷堅志六十卷注云甲乙丙志夷堅志八十卷注云丁戊己庚志則卽陳馬

兩家所載甲至癸二百卷之前一百四十卷也提要據秀水汪氏藏本乃其支甲至支戊五集蓋歷年久遠散佚既多所存不能如宋志之卷數矣是本爲錢唐周信傳梁以善本重加釐正仍以十千編爲十集每集又卷分上下未知與汪氏本同否也其書皆志怪之類而取列子大禹行而見之伯益知而名之夷堅聞而志之語以名書已失其義雖本唐人舊稱恐非此流也陳氏稱裨官小說昔人固有爲之者矣遊戲筆端資助談柄猶賢乎已可也未有卷帙如此其多者不亦謬用其心也哉且天壤間反常反物之事惟其罕也是以謂之怪

苟其多至於不勝載則不得爲異矣世傳徐鉉喜
言怪賓客之不能自通與失志而見斥絕者皆詭
言以求合今邁亦然晚歲急於成書妄人多取廣
記中舊事改竄首尾別爲名字以投之至有數卷
者亦不復刪潤徑以入錄雖敘事猥褻屬辭鄙俚
不恤也案陳氏乃據其全帙評之今本雖所存止此
而所載之事多與廣記相出入至其猥褻鄙俚尙
如陳氏所云即使全帙俱存亦不過爾爾徒以其
南宋人遺笈雖殘闕之餘不得不存備小說之一
種耳是本刊於乾隆戊戌沈

此瞻

何琪

俱爲之序

開窗括異志一卷

鹽邑志林本

宋魯應龍撰

應龍嘉興人理宗時人

四庫全書存目倪氏

宋志補亦載之其書凡九十條皆述所聞見神怪之事閒及古事亦皆唐五代小說所有文多脫落與說郛本相同而是本較少云

高坡異纂三卷

煙霞小說本

明楊儀撰

儀字里未詳官兵部員外郎明史附何孟春傳

四庫全書存

目焦氏經籍志亦載之前有嘉靖壬辰自序稱予少日讀書凡編簡中所載神仙詭怪之說心竊厭之正德嘉靖間兩見邑中怪事始歎古人紀載未必皆妄及居京師文字交游殆徧天下其所言神怪異常之事皆有依據因以新舊所得去其鄙褻

凡陋荒怪難憑者十之五六錄成三卷題曰高坡異纂高坡者予京邸之里名異纂者瑣屑談談不足於立言云耳今觀其書大都齊諧齊東之類無一而可信者自謂鄙褻凡陋荒昧難憑者去其十之五六然所載皆若此等不知其所去者又何如也自有小說以來未有誕妄如此書之甚者說郭續節錄一卷節猶不節耳

祐山雜說一卷

曹祕笈本

明馮從吾撰從吾字惟良平湖人嘉靖壬辰進士官工科給事中以言事謫潛山縣丞遷太倉州知州隆慶中追贈布政司參政四庫全書存目其書凡三十九則多自記其雜事間就見聞所及并記他人

事率託之夢卜荒唐之說未免自誣誣人矣

快雪堂漫錄一卷

奇晉齋叢書本

明馮夢禎撰

夢禎字開之秀水人萬厯丁丑進士官至國子監祭酒

四庫

全書存目其書凡五十九條皆就所見聞而雜記之多因果怪異之事其及他事者纔十之一二蓋開之生平耽慕禪悅晚年復結廬孤山與僧爲侶宜其專事語怪矣末有陸梅谷識語說郭續本僅節錄十一條而已

獐園十六卷

知不足齋袖珍本

明錢希言撰

希言字簡棲吳興人

四庫全書存目前有萬

厯癸丑自序稱獐園者何松樞十九山中稗家一

種志怪傳奇之類是也則何言乎獐也漢人以爲
狡獐也以上自序然其書皆記當時見聞之事凡分仙
幻釋異影響報緣冥跡靈祇淫祀奇鬼妖孽瓊閨
十門瓊閨者紀事物二瓊也所記多屬神怪極爲
猥鄙是徒取悅於俗目而不顧見笑於大方矣明
末小說之書此其最下流者也

耳新八卷

硯雲甲編本

明鄭仲夔撰

仲夔字胃師號龍如信州人

四庫全書存目是

書成於崇禎甲戌前有自序稱余少賤耽奇南北
東西之所經同人法侶之所述與夫星輶使者商
販老成錯陳非一耳涉之而成新殊不忍其流遞

而湮沒也隨聞而隨筆之今觀其書自令德以迄人瑞凡分三十四門僅一百八十九則分門殊嫌冗碎所記皆當時瑣聞雜事而涉於仙佛鬼神者居多蓋亦齊諧志怪之流無關學問耳

矩學雜記二卷

愚山全集本

國朝施閏章撰

閏章仕履見傳記類

四庫全書存目其書

凡八十三條每條各有標目皆就所見聞隨手雜記多及因果報應之事愚山亦以講學名而乃顯背聖人不語神怪之教究不脫詞人氣習本載愚山別集中今遵提要例另志之

冥報錄二卷

說鈴後集本

國朝陸圻撰

圻字麗京號講山錢唐人順治中貢生

四庫全書存

目是書作於順治辛丑前有自序稱予退而老於西湖之上不敢作人史而作鬼史所載皆作善降祥不善降殃與六經之旨同歸無可疑者今觀其書凡二十八則所記端末頗詳誠足以寓彰瘡之意然皆冥途不可知之事未免爲矯誣以滋生民之惑矣前又有譙郡曹無衣序

蜩庵瑣語一卷

說鈴後集本

國朝王逋撰

逋字肱枕嘉興人

四庫全書存目其書凡

六十條皆記明末國初所見聞之事多屬其鄉所有無非志怪者也間有但記雜事者亦皆傳聞

異辭不足以資參核

觚賸八卷續編四卷

臨野堂刊本

國朝鈕琇撰

琇字玉樵吳江人康熙壬子拔貢生官至陝西知府

四庫全

書存目是編成於康熙庚辰越三載又成續編其
前各有自序正集皆就所見聞雜事以所至之地
分記卷一至卷三爲吳觚卷四爲燕觚卷五爲豫
觚卷六爲秦觚卷七卷八爲粵觚續編分言觚人
觚事觚物觚四類類各一卷其文詞皆哀豔奇恣
而記事多近遊戲故不免喜談神怪以徵其詭幻
間有裨於攷據者亦百中之一二耳

果報見聞錄一卷

說鈴後集本

國朝楊式傳撰

式傳號雪崖鄆縣人

四庫全書存目其書

凡七十七條皆錄因果報應之事如其人之善惡所自取此理本出六經而惜其宗二氏以立言以致有悖理之談而不覺也

簪雲樓雜說一卷

說鈴後集本

國朝陳尚古撰

尚古字雲瞻德清人

四庫全書存目其書

凡六十一則皆記瑣屑之事而多涉怪異惟所記

本朝制科一則前明廷杖一則及賀宿紀聞一

則辨魏忠賢卷四任氏冒稱明熹宗張皇后事足

備考證耳

見聞錄四卷

原刊本

國朝徐岳撰

岳字季方嘉善人

四庫全書存目作一卷

蓋據說鈴後集本也其書凡一百二十三條皆以所聞所見之事筆之成帙皆非世所恆聞恆見者也其爲語怪之書幾與錢簡棲猶園相等焉前有楚黃張希良序說鈴所收本則已節去其十五條云

信徵錄一卷

說鈴後集本

國朝徐慶撰

慶號濱溪自署曰烏山人不知何地之烏山也

四庫全書

存目前有康熙辛巳自序稱輪迴因果釋氏之說儒者之所不道此余之所大惑也爰舉年來所見所聞信而有徵者輯而著之卽名之曰信徵錄以

寓勸戒之意今觀是書凡六十七則前六則皆錄時人所記而繫以名氏以後皆其所自爲記多荒誕不經之談雖曰以寓勸戒特恐其書之不徵不信不信民弗從耳

述異記三卷

說鈴後集本

舊題東軒主人撰不著名氏前有康熙辛巳自序則卽其時之人也 四庫全書存目是書皆記順治康熙間事大都侈談神怪百無一真其謂天下之大宇宙之廣何所不有此亦任其自言之而自信之耳若博物君子則豈取於此

曠園雜志二卷

說鈴後集本

國朝吳陳炎撰

陳炎字宇崖號芋畦錢唐人官任平縣知縣

四庫全

書存目其書皆記所見聞奇異之事自明末以迄

昭代凡一百五十一條所記涉神怪者居多不

過如搜神志怪惑人聽聞而已其有可以補正史之所未備者亦寥寥無幾耳前有康熙癸未其兄

青壇序

閩中錄異二卷

原稿本

國朝黃錫蕃撰

錫蕃字晉康號掛升海鹽人

是編就羣書中所

載異聞瑣事有涉於閩中者采摭成帙如明徐伯

昌

昌祚

燕山叢錄之流而各注其所采書名於其

下則較徐氏書頗有資於考證間綴按語亦殊精

審知其記事纂言之功深矣前有嘉慶丁卯自序

鄭堂讀書記卷六十六